



Kalaallit Nunaata inuiaqatigiillu kalaallit amerikamiut Kalaallit Nunaanni sakkutooqarnerat annertunerpaamik pissarsiaqaatigalugulu iluaqutigisinnaanera qulakkeerniarlugu ataatsimoorussamik danskit/kalaallillu USA-mik isumaqatiginninniarnissaannik Naalackersuisut peqquneqarnissaannik Inatsisartut aalajangiiffigisassaattut siunnersuut. Naalackersuisut Illersornissamut Isumaqatigiissut 1951-imeersoq tamatumalu kingorna tapiliunneqartut naapertorlugit USA-p Nunatsinni suliaqartarnerini nunatsinnut erseqqissunik iluaqutaanissaa suli sulissutigissavaat , tassunga ilanngullugu amerikamiut sakkutooqarfikui sanaartukkallu allat qimaannarneqarnikut pillugit avatangiisitigut akisussaaffiup paatsuugassaannigsumik inissinneqarnissaa, pisariaqarpallu tapiliussamik nutaamik isumaqatiginninniarnermik imaluunniit Illersornissamut Isumaqatigiissutip 1951-imeersup isumaqatiginninniutigineqaqqinnissaanik piumasqaateqarlutik. (Inuussutissarsiornermut, Suliffeqarnermut, Niuernermet Nunanullu Allanut Naalackersuisoq)

(Siullermeernera)

Demokraatini iluarisimaarparput Nunanut allanut Sillimanissamullu Ataatsimiititaliaq Naalackersuisullu uani suliame qimoqatigiimmata. Tamatta isumaqatigiissutigaarput amerikamiut nunatsinni sakkutooqarfeqarnerat inuiaqatigiit kalaallit sapinngissamik annerpaamik iluaqutissarsivigisariaqaraat.

Ajoraluartumik tamatta takuarput Pituffik pillugu kiffartuussinissamut isumaqatigiissutit sullivimmuut amerikamiut pigineqartumut tunniunneqarneranut atatillugu suleriuseq qanoq kusanaatsigisoq ingerlanneqartoq. Suleriuseq manna tikillugu suli eqqartuussivinni ingerlanneqarpoq. Tamanna kusanangilaq aamma eqqortuliornerunngilaq iligisaq pingaarutilik taamatut pissusilersorfigissallugu.

Suleriutsip takutippaa naatsorsuutigisinnaanngikkippu, Illersornissamut isumaqatigiissut 1951-meersoq tamatumalu kingorna tapiliunneqartut naammattumik Kalaallit Nunaannut iluaqutaanngitsut. Taamaattumik inissaminiippoq isumaqatigiinniartoqaqqinnissaa, Demokraatini isumarput naapertorlugi siunertaralugu amerikamiut nunatsinniinnerisa Kalaallit Nunaannit sapinngissamik annerpaamik iluaqutissarsivigineqarnissaa.

Uani taamaallaat pinngilagut suliffissat tamatumalu nassatai akileraarutit. Aamma eqqarsaatigaagut illugiilluni isumaqatigiissuteqarnissat assersuutigalugu ilinniartissat, ilinniarnermut atatillugu sungiusaatigalugu suliffissat niueqatigiinnissamullu tunngasut pillugit. Tamatuma saniatigut aamma pingaaruteqarpoq ersarissumik isumaqatigiissuteqarfigissallugu



amerikamiut sakkutooqarfikuini qimatani saliinissaq kiap akisussaaffigineraa aamma kiap saliineq akilissaneraa. Isumaqatigiissut taanna aamma siumut isigaluni isumaqatigiissutaassaaq, atuuttussanngorlugu ulloq taanna amerikamiut Pituffik qimappassuk.

Demokraatini nalunngilarput amerikamiut nunatsinniinnissaat pisariaqartoq nunatta nunanut takornartanut illersorneqarnissaa eqqarsaatigalugu - tamanna qujamasuutigaarput. Kisianni puigussanngilarput Pituffik sakkutooqarfittut USA-mut aamma pingaaruteqarmat sakkutooqarnikkut pissaanilissuurtut inissisimaniarneranut atatillugu.

Tamanna tunngavigalugu USA-p nunatsinniinnera tamatta iluaqutissarsivigisarparput kisiannili sakkutuujunngitsut isumaqatigiissutaat sakkutooqarfimmut atasut ullumikkut atuuttut eqqarsaatigalugit nunatta annikippallaamik iluaqutissarsivigisarpaat tamannalu allanngortittariaqarpoq.

Tamanna tunngavigalugu Naalakkersuisut aalajangiiffigisassatut siunnersuutaat ilalerparput innersuullugulu Nunanut Allanut Sillimanissamullu Ataatsimiititaliamut suliareqqitassanngorlugu.